



Con motivo do día mundial dos océanos que se celebra o venres 8 de xuño, ADEGA convoca a todas as entidades interesadas a unirse nun evento de reivindicación e educación ambiental contra a contaminación mariña. **O 8 de xuño diferentes grupos de toda Galiza, participarán na limpeza simultánea de praias, nas tres provincias costeiras.**

Centros de ensino, escolas de surf, centros de mergullo, clubs de piragüismo, vela, asociacións de todo tipo ou grupos de particulares están chamados a limpar as súas praias e denunciar esta problemática ambiental.

Únete e limpa a túa praia!

A maioría dos residuos inorgánicos que producimos e consumimos non teñen unha xestión axeitada. Moitos deles rematan incinerados, en vertedoiros ou o que é peor, nos mares. Unha elevada porcentaxe do lixo que atopamos nas praias provén de zonas do interior, que, sumado a outros vertidos acadan as 7 toneladas de plástico que cada ano rematan nos océanos.

Alén do seu impacto visual os residuos plásticos no mar son un grave perigo para a fauna mariña. Moitos animais acaban enredados en bolsas, sacos, redes, etc., o que habitualmente provoca a súa morte por asfixia ou por vulnerabilidade ante as súas presas. A fauna mariña inxire plásticos confundíndoos con alimento o que finalmente provoca tamén a súa morte.

Outro dos problemas máis graves é que o plástico acaba reducíndose en pequenos anacos que son ingeridos por peixes que finalmente rematarán nos nosos pratos. Isto fai que os compoñentes prexudiciais e perigosos que conteñen os plásticos pasen aos seres humanos, afectando directamente á nosa saúde.

A mellor maneira de actuar ante este problema é reducir o noso consumo de plástico, reutilizar o máximo posible e reciclar. Porén, para conseguir un cambio nos hábitos de consumo tamén precisamos dun cambio de conciencia.

Facemos unha chamada á poboación para conseguir unha masa crítica que se achegue ás praias o Día dos Océanos, e consiga por unha banda mellorar o estado das nosas costas pero sobre todo conseguir un cambio de conciencia cidadá.

Se estás interesado/a en participar ponte en contacto con nós

Lucía Parente Romero

lucia@adega.gal

tlf: **981 57 00 99**